



## Publicaziuns dalla vischnaunca, jamna 27

### Success professiunal

La fin da zercladur ha **Patricia Giger** terminau cun la fetg buna nota da 5,3 siu emprendissadi da commercianta ch'ella ha absolviu tier l'administraziun communal. Tier il menaschi tecnic han Marc Deplazes ed Angelo Vincenz medemamein terminau cun oreifer success lur emprendissadis da bostger. **Angelo Vincenz** ha contonschiu cun la nota da 5,6 igl'emprem rang e **Marc Deplazes** cun la nota da 5,3 il tierz rang. Nus gratulein cordialmein a Patricia Giger, Marc Deplazes ed Angelo Vincenz per lur excellents resultats e giavischein ad els mo il meglier per lur veta professiunala sco era privata.

L'entschatta fenadur 2021 ha **Ramon Manetsch** entschiet siu emprendissadi da commerciant tier l'administraziun communal. Ad el giavischein nus in interessant e variont temps da formaziun.

Suprastonza communal

---

### Serrada vias d'ual muort lavurs da construcziun

Duront il temps da baghegiar ston ils tschancuns dils plazzals da construcziun vegnir serrai pil traffic motorisau. En cass da viadis urgents en favur dall'agricultura san ils pertuccai secunvegnir directamein cugl impressari el liug. Il stan actual davart las restricziuns vegn communicaus silla pagina d'internet [www.disentis.ch/strassen](http://www.disentis.ch/strassen). Muort ils plazzals pretensius sa ei dar midadas dallas restricziuns da traffic era a cuorta vesta.

#### Plaun Menisch: Plaunca Su–Pardi

Da Plaunca Su entochen Pardi resta la via serrada entochen igl atun. Per contonscher ils mises a Plaun Menisch exista la pusseivladad da carrar sur la Val da Segnas. Impressari: Berther Bau und Industrie AG, Ibrahim Bajraktaraj, 079 433 13 10.

#### Via Run: Marietta–Plaun Tir

Naven dalla Marietta entochen Sils Bletschs ei la via serrada naven da **gliendisdis, ils 17 da matg 2021 entochen fin zercladur 2021**.

Impressari Josef Gall, 079 216 07 51.

Las reparaturas vid la via naven dalla Truaisch entochen la tegia da Plaun Tir vegnan exequidas naven **da miez fenadur entochen la fin settember 2021**. Igl access sin quei tschancun ei sulettamein pusseivels pil traffic plaun.

#### Via Fontaunas: Mumpé Medel–Clavadias –Fontaunas

Vid la via dallas Fontaunas ei previu dad entscheiver cullas lavurs naven **dils 21 da zercladur 2021**. Las lavurs cuozan entochen **ils 15 da fenadur 2021**. Duront quei temps resta la via serrada pil traffic motorisau.

#### Via Cavorgia Mises las Cavorgias–Camacher–Riada

A Cavorgia ei la via serrada naven **dils 15 da zercladur 2021**. Pil mument ein ils mises a Camacher–Cavorgia Sura pertuccai dallas restricziuns da traffic. Las restricziuns da traffic serestrenschan per regla duront l'jamna.

Nus supplichein da prender enonuschientscha da quest avis ed engraziein per la capientscha.

Uffeci forestal Disentis/Mustér

---



### Communicaziun da traffic

#### Serrada dalla Via Pardomat

Preziadas convischinas, preziai convischins

Igl Uffeci cantunal da construcziun bassa dil cantun Grischun communichescha davart la serrada dalla Via Pardomat sco suonda.

Sin fundament da lavurs da renovaziun dil surpassadi da viafier (Viafier retica) vegn la part dalla Via Pardomat denter Madernal e la Punt Russein serrada per tut traffic incl. il traffic plaun **mesjamna, ils 14 da fenadur naven dallas 8.00 entochen gievgia, ils 15 da fenadur 2021, allas 16.00**. Per vehichels entochen 28 tonnas exista in sviament sur Sumvitg–Cumpadials–Falens. Vischinas e vischins ein envidai da risguardar las signalisaziuns corrispundentas.

Informaziuns actualas anfleis Vus sut: [www.strassen.gr.ch](http://www.strassen.gr.ch)

Per damondas stat igl uffeci da construcziun bassa bugen a Vossa disposiziun. Nus engraziein per Vossa capientscha e salidein amicablamein.

Uffeci da construcziun bassa dil Grischun,  
district 6, 081 257 68 8

---